

Broj: 03-02-287/2017
Sarajevo, 12.05.2022. godine

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primljeno: 16-05-2022

Org. jed.	Broj	Priloga	Vrijednost
01-	02-	733	17

PARLAMENT FEDERACIJE
BOSNE I HERCEGOVINE

- Predstavnički dom -
gosp. Mirsad Zaimović, predsjedavajući
- Dom naroda -
gosp. Tomislav Martinović, predsjedavajući

PREDMET: Veza naši akti broj: 03-02-287/2017 od 13.06.2018. godine, 26.09.2019. godine i 01.11.2021. godine

Poštovani,

U skladu sa članom IV.B.3.7.c) (III) Ustava Federacije BiH, a u vezi sa odredbama čl. 185. i 190. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08 i 26/20) i čl. 177. i 183. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), **u prilogu Vam dostavljam AMANDMANE VLADE FEDERACIJE BOSNE I HERCEGOVINE NA PRIJEDLOG ZAKONA O POREZU NA DOHODAK**, koje je utvrdila Vlada Federacije Bosne i Hercegovine na 314. sjednici, održanoj 12.05.2022. godine.

Amandmani Vlade Federacije Bosne i Hercegovine postaju sastavni dio Prijedloga zakona o porezu na dohodak, koji sam u parlamentarnu proceduru, radi razmatranja i usvajanja, dostavio aktom broj: 03-02-287/2017 od 13.06.2018. godine.

Amandmani se dostavljaju na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,


PREMIJER
Fadil Novalić

Prilog: kao u tekstu na bosanskom jeziku

Cc: Federalno ministarstvo finansija-
Federalno ministarstvo financija
gđa Jelka Milićević, ministar

GOVERNMENT

Na osnovu člana 73. stav (4) Poslovnika o radu Vlade Federacije Bosne i Hercegovine - Prečišćeni tekst ("Službene novine Federacije BiH", br. 6/10, 37/10, 62/10, 39/20 i 67/21), Vlada Federacije Bosne i Hercegovine je na 314. sjednici, održanoj 12.05.2022. godine, utvrdila

**AMANDMANE
NA PRIJEDLOG ZAKONA O POREZU NA DOHODAK**

AMANDMAN I

U članu 8. stav (1) tačka d) mijenja se i glasi:

„d) primanja ostvarena pa osnovu posebnih propisa o roditeljima njegovateljima, nezaposlenim porodiljama i dječijem dodatku, kao i novčana sredstava za opremu novorođenčeta;

U stavu (2) iza tačke v) dodaje se nova tačka z) koja glasi:

„z) mjesečna naknada za rad u radno-terapijskim poslovima, fizičkom licu smještenom u ustanovi socijalno-zdravstvene zaštite u kojoj se nalazi na liječenju u visini i na način propisan Pravilnikom o primjeni Zakona o porezu na dohodak.“

OBRAZLOŽENJE

Odredbom člana 8. Prijedloga zakona navode se prihodi koji su izuzeti iz osnovice oporezivanja. Predloženom izmjenom vrši se dopuna izuzetih prihoda u tački d) koji su prije ovog amandmana sadržavali samo dječiji dodatak, kao i novčana sredstava za opremu novorođenčeta, sa naknadom roditeljima njegovateljima i nezaposlenim porodiljama.

Zakonom o roditeljima njegovateljima u Federaciji BiH („Službene novine Federacije BiH“, broj: 75/21) uvedena je nova socijalna kategorija primanja: naknada roditeljima njegovateljima, te je ista predložena da se inkorporira u kategorije izuzetog prihoda od oporezivanja u članu 8. Prijedloga zakona.

Zakonom o zaštiti osoba s duševnim smetnjama ("Službene novine Federacije BiH", br. 37/01, 40/02, 52/11 i 14/13) predviđena je naknada na ime rada u radno-terapijskim poslovima u ustanovama u kojima se nalaze na liječenju (član 11. tačka 5.) te je ista predložena da se inkorporira u kategorije izuzetog prihoda od oporezivanja u članu 8. Prijedloga zakona.

Također je Prijedlogom zakona o materijalnoj podršci porodicama sa djecom u Federaciji BiH predviđena naknada na ime dječijeg dodatka i novčana pomoć nezaposlenoj porodilji, te je isto predloženo da se inkorporira u kategorije izuzetog prihoda od oporezivanja u članu 8. Prijedloga zakona.

AMANDMAN II

U članu 55. stav (5) briše se.

OBRAZLOŽENJE

Ovom odredbom uređena je obaveza pravnih lica da prijave poreza Poreznoj upravi FBiH dostavljaju elektronskim putem. Predloženo je brisanje ovog stava, jer postoji bojazan da zbog kratkog roka za primjenu ovog propisa, neće se stvoriti uslovi na strani Porezne uprave. Postoji pravni osnov da se ovaj dio uredi podzakonskim aktom, kada se stvore uslovi.

AMANDMAN III

U članu 60. stav (3) tačka d) riječi: „od pravnog lica“ zamjenjuju se riječju: „ostvaren“

OBRAZLOŽENJE

Odredbom člana 60. taksativno se navodi ko je obveznik podnošenja godišnje porezne prijave, te se ovom odredbom uređuje uključivanje odnosno evidentiranje ostvarenog dohotka na teritoriji Republike Srpske i Brčko Distrikta od strane poreznih obveznika na poreznoj prijavi. Kako je do sada bilo navedeno „dohodak od pravnog lica iz Republike Srpske ili Brčko Distrikta“, što je ograničavalo samo na dohodak ostvaren od pravnih lica, te je predloženo brisanje i izmjena ovog ograničenja, i nova formulacija bi uključivala bilo koji dohodak ostvaren iz Republike Srpske ili Brčko Distrikta.

AMANDMAN IV

U članu 62. stav (1) riječi: „koji se utvrđuje na osnovice svih dohodaka pa ovom zakonu,“ brišu se, a na kraju rečenice tačka se zamjenjuje zarezom i dodaju riječi: „izuzev konačne porezne obaveze.“

U stavu (4) riječi: „stav (2)“ zamjenjuju se riječima: „stav (3)“, a iza riječi: „osiguranja“ stavlja se tačka i ostatak teksta briše se.

OBRAZLOŽENJE

Ovim članom generalno se uređuje utvrđivanje godišnjeg poreza na dohodak, te su uočene greške koje se ovim amandmanom ispravljaju. Naime, predlaže se brisanje dijela teksta koji se odnosio na prvobitno predloženo progresivno oporezivanje, s obzirom da je sad predložena jedna godišnja stopa poreza na dohodak od 13% izuzev kod dohotka od ulaganja kapitala, koji je konačna porezna obaveza. Stoga je predloženo brisanje radi jasnoće pravne norme. U stavu (4) vrši se ispravka greške koja je uočena, jer se poziva na pogrešan stav u zakonu.

AMANDMAN V

U članu 78. datum: „01.01.2020. godine“ se zamjenjuje datumom „01.01.2023. godine“.

OBRAZLOŽENJE

Imajući u vidu činjenicu da je sjednica Parlamenta Federacije BiH na kojoj se raspravlja o tekstu Zakona o porezu na dohodak zakazana nakon 01.01.2020. godine, a taj datum je naveden kao datum početka primjene zakona, potrebno je izmijeniti datum jer bi u suprotnom pomenuta odredba značila retroaktivnu primjenu zakona. Predlažemo da početak primjene zakona bude 01.01.2023. godine s obzirom da je u pitanju porezni zakon koji zahtijeva primjenu od početka poreznog perioda odnosno kalendarske godine. Vlada Federacije BiH je Amandnom XVIII iz septembra 2019. godine izmijenila početak primjene zakona sa 01.01.2019. godine na 01.01.2020. godine, a koji je postao sastavni dio Prijedloga zakona.

V. broj: *667*/2022
12.05.2022. godine
Sarajevo

